



Las bovas da Bondo han chaschunà gronds donns. Per gronda part ha l'Assicuranza d'edifizis surpiglià ils custs da quels donns. MAD

«A Bondo è vegnida fatga lavur exemplarica»

Assicuranza d'edifizis dal Grischun

DA GION NUTEGN STGIER / ANR

■ **Dus fieus pli gronds e las bovas da Bondo l'avust 2017 han custà summas pli grondas a l'Assicuranza d'edifizis dal Grischun. Cun 29 milliuns francs donns è resultada ina sperdita operativa da 13,7 milliuns francs, il resultat da gestiun il pli nausch dapi 12 onns.** Ier ha gì lieu a Cuira la conferenza annuala da medias da l'Assicuranza d'edifizis dal Grischun. Quella organizaziun ha gia 109 onns ed è ina da las pli impurtantas assicuranzas obligatoricas. Directur è gia dapi intgins onns *Markus Feltscher* da Favugn e president è il deputà *Hans Geiseler* da Vaz sut. L'organizaziun ha ina colavuraziun stretga cun la protecziun cunter incendis che vegn manada da *Marco Sgier* da Vella. Ina ulteriura organizaziun ch'è affiliada a l'Assicuranza d'edifizis è quella dals pumpiers cun il mainagestiu *Hansueli Roth* da Serneus.

Bunamain 160 000 edifizis assicurads Per mintga object è l'Assicuranza d'edifizis obligatorica ed en vigur va quella cun

la collaudaziun entras la protecziun cunter incendis. Immediat cun la lubientscha da construir ina chasa per exempel vegn er fatga ina uschenunada assicuranza per il temp da construcziun e cura che la construcziun è terminada è l'object assicurà entras l'Assicuranza d'edifizis. En noss chantun èn assicurads 160 000 edifizis e quai cun in chapital d'assicuranza da 110 milliardas francs. Sco quai ch'il directur ha ditg sajan las premias per l'Assicuranza d'edifizis en il Grischun, suenter quellas en il chantun Turitg, la segunda pli bassa da l'entira Svizra.

Cuira a la testa

En il rapport annual da l'Assicuranza d'edifizis dal Grischun èn er da leger da mintga vischnanca la summa assicurada per ils bajetgs. A la testa è qua Cuira cun total 7644 edifizis ed ina summa da valur assicurada da stgars 12 milliardas francs. Tavau è sin il segund plaz cun en tut 5620 bajetgs cun ina valur da 7,7 milliardas francs. Mustér per exempel ha 2198 edifizis ed il chapital d'assicuranza giascha tar 1,2 milliardas francs.

Laud per las autoritads da la vischnanca Bregaglia

Ils donns da feu muntan a 14 milliuns francs e la mesadad da quella summa saja sa resultada da dus incendis gronds d'edifizis cun utilisaziun commerciala, ha ditg Feltscher. Quai sajan la Baustoffe SA a Termin e la Landi a Tusaun, omadus bajetgs cun in immens donn entras il feu. Da tut ils donns elementars da 14 milliuns francs derivan var 12 milliuns da l'eveniment da Bondo l'avust passà. In grond laud meritan las autoritads da la vischnanca da Bregaglia che hajan prestà ina lavur ordvart professionala sut la direcziun da la presidenta communal *Anna Giacometti* ed en collavuraziun cun ils specialists da l'uffizi da guaud e privels da la natura, da l'uffizi da militar e da protecziun civila, da la polizia, dals pumpiers e dal militar, ha punctuà Feltscher. L'onn da bursa excellent ha pudì pli che gular l'auta summa da donn. Il resultat tuttina positiv da 20 milliuns francs è d'engraziar al surpli or da la fatschenta d'investiziuns. Questa ultima ha contribuì – cun ina performance da 7,8% e cun in gudogn da 51,5 milliuns francs – ad in resultat annual positiv.